

ՀԱՅԱՍՏԱՆԻ ՆՎԱՃՈՒՄԸ
ԲՅՈՒՋԱՆԴԱԿԱՆ ԿԱՅՍՐՈՒԹՅԱՆ ԿՈՂՄԻՑ

Հ. Մ. ԲԱՐԹԻԿՅԱՆ

863 թ. բյուզանդական հայազգի զորավար Պետրոնասը Պոսոն վայրում ջախջախեց Մելիտենեի ամիրա Օմար իբն Աբդալլահ ալ-Ակտայի ղլխավորած արաբական զորքերը¹։ Դրանով իսկ արաբների դեմ մղված դարավոր պայքարում նախաձեռնությունն անցավ բյուզանդացիներին։ «Հայկական հարցը», եթե կարելի է այդպես արտահայտվել, Բյուզանդական կայսրության արտաքին քաղաքականության մեջ երկդարյա քնից հետո նորից հրապարակ եկավ։ Բյուզանդիան ամեն կերպ աշխատում էր նորից իրեն ենթարկել այդ երկիրը և իր նպատակին հասնելու համար գործի էր դնում ոչ միայն իր ռազմական ուժերն ու փորձված դիվանագիտությունը, այլև ջանք էր թափում իր ոտնձգությունները հիմնավորել նաև «պատմականորեն»։

Վասիլ Ա Մակեդոնացի կայսրը իրեն Արշակունի հռչակեց², թեև նրա երակներում արշակունի արյան մեկ կաթիլ անգամ չկար։ Վասիլը, դիմելով այդ քայլին, նպատակ ուներ ոչ միայն քողարկել իր հասարակ ծագումը, օրինականացնել իր իրավունքները բյուզանդական գահի նկատմամբ։ Նա ուներ շատ հեռունելը գնացող նպատակներ, այն է՝ Հայաստանը վասալական կախման մեջ գցել։

Հայաստանում Արշակունիների հարստության գոյության ժամանակ հայկական բոլոր նախարարությունները իշխող հարստության վասալներն էին, այդ թվում և IX դարում անկախություն ձեռք բերած և իրենց իշխանությունները հռչակած Բագրատունիները, Արծրունիները, Անձևացիք, Սյունիները և այլն։ Իրեն Արշակունի համարելով, հասկանալի է, Վասիլ Ա-ը հանդես էր գալիս որպես բոլոր վերոհիշյալների սյուլերենը, ցանկանում de jure իրեն ենթարկել Հայաստանը։ Այդ բանը հաստատվում է և Բյուզանդական կայսրության արտաքին գործոց նախարարության գրասենյակում թխված մի «տեսություն», համաձայն որի պարթևների Արշակ արքայի քաջության և ձեռք բերած փառքի պատճառով իբրև թե օրենք դարձավ, որ նրա մահից հետո պարթևների, մարերի և հայերի վրա թագավորեն բացարձակապես Արշակունիների շառավիղները³։ Նպատակը պարզ է. քանի որ Վասիլ Ա-ը «Արշակունի» է, ապա այդ «օրենքի» համաձայն նա, ի միջի այլոց, պետք է թաղավորի նաև հայերի վրա։ Ինչպես տեսնում ենք, կեղծիքը բավականին սրամիտ է։

Բայց, հասկանալի է, երկդարյա ստրկությունից հետո հազիվ անկախություն նվաճած հայերի համար այդ «տեսություններն» ու «օրենքները» ոչ մի լավ բան չէին կանխագուշակում։ Նրանք, հազիվ մեկի լուծը թոթափած, ամեն-

¹ Theophanes Continuatus, Bonnae, 1838, էջ 183։

² Նույն տեղում, էջ 212։

³ Նույն տեղում, էջ 212—213։

նեին էլ չէին ուղում ընկնել մի ուրիշի լծի տակ, թեկուզ և քրիստոնյա պետութիւն։ Նրանք ամեն կերպ ջանք էին թափում ընդդիմակայել բյուզանդական նվաճողական քաղաքականութիւնը։

Բյուզանդիայի դեպի Հայաստան առաջխաղացման առաջին խոչընդոտը պալլիկյաններն էին։ Երկարատե և արյունահեղ պայքարից հետո կայսրութիւնն ի վերջո հաջողւում է ՏՂԳ թ. վերջնականապէս պարտութիւն մատնել աղանդավորներին⁴։ Բայց պալլիկյանների քաղաքական և ռազմական ջախջախումը դեռ չէր նշանակում նրանց ֆիզիկական կործանումը։ Աղանդավորների մի մասին, ըստ երևույթին, հաջողվեց ապաստան գտնել իրենց վաղեմի դաշնակից արաբների մոտ։ Այդ առնչությամբ պետք է ավելի ուշադիր ուսումնասիրել Վասիլ Ա-ի հաջորդ Առն Զ-ի ժամանակ պալլիկյանների կենտրոններ Տեֆրիկէի և Արգաուսի (Արգուլանի) մոտիկ, բայց արաբական տիրապետութիւն տակ գտնվող շրջաններում հայազգի մի շարք գործիչների խաղացած ռազմական և քաղաքական դերը։ Խոսքը Մելիտենեի շրջանում գործած Մելիասի (Մլեհի), Վասակ, Գրիգորիկ և Պաղուն եղբայրների և Իսմայիլ-հայի մասին է, ինչպես և Չորրորդ Հայքի Դեգիկ վայրում գործած Մանվելի և նրա որդիներ Պանգրատուկասի, Յախնուկասի, Մուղաֆարի և Հովհաննեսի։

Դժվար չէ համոզվել, որ նրանք բոլորը Չորրորդ Հայքի և Մելիտենեի բնիկներ չեն, թեև Կոստանդին Միրանաժինը նրանց այնտեղ է հիշատակում⁵։ Դեռ ավելին, նրանք հայ նախարարական կամ իշխանական տների ներկայացուցիչներ էլ չեն։ Նրանց անունների մեծամասնությունը դրա վկայությունն է։ Իսկ երբ ի վերա ամենայնի հիշենք Կոստանդին Միրանաժինի խոսքերն այն մասին, թե Մելիասը «դեռ փախստական էր Մելիտենեում»⁶, պարզ կդառնա, որ նա արաբների մոտ է փախել, պալլիկյանների դաշնակից Օմար իբն Աբդալլահ ալ-Ակտայի քաղաքը, բյուզանդիայից։ Հիմքեր կան ենթադրելու, որ Մելիասից բացի Մելիտենեի արաբների մոտ և Չորրորդ Հայք փախան և վերևում հիշատակված Վասակը, Գրիգորիկը, Պաղունը, Իսմայիլը, Պանգրատուկասը, Յախնուկասը, Մուղաֆարը և Հովհաննեսը։

Պատահակա՞ն էր արդյոք նրանց փախուստը Բյուզանդիայից դեպի պալլիկյանների կենտրոնից ոչ շատ հեռու ընկած այս շրջանները։ Ըստ երևույթին, ոչ։ Առն Զ-ի թագավորութիւն ժամանակ նրանք որոշում են վերադառնալ Բյուզանդիա, հետևաբար նրանք սպասում էին նախորդ կայսեր վախճանին, իսկ նա Վասիլ Ա-ն էր, պալլիկյանների երգվյալ թշնամին։ Մենք ճշմարտութիւնից հեռու չենք լինի, եթե ենթադրենք, որ նրանց՝ արաբների մոտ փախչելու պատճառը Վասիլ Ա-ի հալածանքներն էին, իսկ Վասիլ Ա-ը հենց պալլիկյաններին էր հալածում։ Մեր ենթադրութիւնն օգտին է խոսում թե՛ այն հանգամանքը, որ և՛ Մելիտենեն, և՛ Չորրորդ Հայքը գտնվում էին հենց պալլիկյանների նախկին հանրապետութիւնը կից, այլև այն, որ Մելիասը համաձայնվեց Առն Զ-ի ժամանակ վերադառնալ Բյուզանդիա այն պայմանով միայն, որ ին-

⁴ M. Canard, Note..., „Revue des Études Arméniennes“, t. IV, 1967, էջ 403.

⁵ De Administrando Imperio, ed. Gy. Moravcsik, Budapest, 1949, էջ 238.

⁶ Նույն տեղում։ Այստեղ ավելորդ չէ նշել, որ նրանք նախքան Բյուզանդիա անցնելը Խարսիանոս բանակաթմբի գորավար Եվստաթիոս Արգիրոսից գրավոր երաշխավորագիր պահանջեցին, որ Բյուզանդիայում կոստանան տիրույթներ և կառավարման համար շրջաններ։

քը կդառնա Եփրատիա շրջանի կլեյսուրարիսը, իսկ Եփրատիան ոչ այլ ինչ է, քան մոտիկ անցյալում հենց պալլիկյաններին պատկանող Տեֆրիկեի շրջանը⁷։

Չորրորդ Հայքը և Մելիտենեն դեռ Ֆիլիպպիկոս-Վարդանի ժամանակ (711—713 թթ.) պալլիկյանների համար ապաստարան էր⁸։ Դրանից քառասուն տարի անց Կոստանդին Ե Կոպրոնիմոսը հենց Մելիտենեից պալլիկյաններին դաղթեցրեց Թրակիա⁹։ IX դարի սկզբում հենց Մելիտենեում ապաստան գտավ պալլիկյանների խոշորագույն աղանդապետ Սերգիոսը իր հետևորդների հոծ դանգվածներով¹⁰։ Եվ վերջապես Մելիտենեում ապաստանեց պալլիկյանների ռազմական ղեկավար նշանավոր Կարբեասը (մահացել է 863 թ.) հինգ հազար պալլիկյաններով¹¹։ Այդ լույսի տակ իմաստ են ստանում նաև բյուզանդական պատմիչ Գենեսիոսի խոսքերն այն մասին, որ IX դարի 70-ական թթ. սկզբում փրկված պալլիկյանները ապաստան գտան Ասորիքում¹²։

Հայտնի է, որ Վասիլ Ա-ի մահից հետո նրա որդի Լևոն Զ-ը փոխեց իր հոր քաղաքականությունը պալլիկյանների նկատմամբ։ Նա դեմ չէր ռազմունակ աղանդավորներին օգտագործելու իր նպատակների համար։ Պատահական չէ, որ Լևոն Զ-ը պալլիկյանների առաջնորդ Խրիսոբիրի թիկնապահ Դիակոնիցեսին մենսուրատորի աստիճան տվեց և պալլիկյաններից բաղկացած զորամասով Խտալիա ուղարկեց կայսրության թշնամիների դեմ¹³։ Ըստ երևույթին նա այդպես վարվեց նաև վերոհիշյալ հայերի նկատմամբ, այն տարբերությամբ միայն, որ նրանց արևմուտք չուղարկեց, այլ թողեց արևելքում, ըստ կնքված համաձայնության, և նրանց օգնությամբ նվաճեց նորանոր հայկական հողեր։ Այդ առնչությամբ հետաքրքրական է նշել, որ թեև վերոհիշյալ հայ գործիչները կառավարման համար ստացան մի շարք քաղաքներ ու գավառներ Բյուզանդիայում, այնուամենայնիվ շատ շուտով, տարբեր պատճառաբանություններով զրկվեցին դրանցից։ Վասակն, օրինակ, աքսորվեց «գավառաճանելու նպատակ» ունենալու մեղադրանքով։ Բոլոր նշված հայերից միմիայն Մելիասն է, որ այնուհետև հիշվում է աղբյուրներում։

Ամրանալով այստեղ, Բյուզանդական կայսրությունը ջանք էր թափում շարժվել առաջ։ Օրակարգում էր Թեոդոսուպոլիս-Վարինի հարցը, քաղաք, որ գտնվում էր արաբ ամիրաների ձեռքում։ Քաղաքին տիրանալու համար Բյուզանդիային անհրաժեշտ էր Կեսեոն կոչված բերդը, որը սակայն վրացիների ձեռքում էր գտնվում։ Հակառակ կայսրության բոլոր խոստումներին, թե Թեոդոսուպոլիսի գրավումից հետո Կեսեոնը կվերագարձվի վրացիներին, վերջիններս ոչ մի կերպ այն չգիջեցին կայսրությանը¹⁴։ Հետաքրքրական է նշել, որ Թեոդոսուպոլիսի գրավման դեմ էին և՛ հայերը, և՛ վրացիները։ Նրանք երկուսն էլ նախընտրում էին, որ քաղաքը մնա արաբների ձեռքում, քան թե անցնի

⁷ Տե՛ս է. Հոնիգմանի 960 թ. քարտեզը նրա՝ Die Ostgrenze des Byzantinischen Reiches, Bruxelles, 1935, աշխատության մեջ։

⁸ Р. Бартикян, К вопросу о павликианском движении в Византии в первой половине VIII в., «Византийский временник», т. VIII, 1956.

⁹ Theophanis Chronographia, ed. C. de Boor, Lipsiae, 1883, t. II, էջ 429.

¹⁰ Petri Siculi Historia Manichaeorum, Migne, Patrologia graeca, t. 104, cap. XLI.

¹¹ Theophanes Continuatus, էջ 166—167; Petri Siculi, cap. XLII.

¹² Genesii Regum, էջ 121.

¹³ Theophanes Continuatus, էջ 313; Genesii Regum, էջ 125.

¹⁴ De Administrando Imperio, էջ 208.

կայսրությանը: Հարցն այն է, որ արաբները նրանց համար լուրջ վտանգ չէին ներկայացնում արդեն, իսկ Բյուզանդիայի նպատակները բազմադարյան դառն փորձից հայտնի էին: Հայերի և վրացիների համար ավելի ձեռնտու էր իրենց և Բյուզանդիայի միջև ունենալ այնպիսի մի քաղաքական միավորում, ինչպիսին էր Թեոդոսուպոլսի ամիրայությունը: Բայց հայերի և վրացիների դիմադրությունը երկար չտևեց: Ի վերջո, 949 թ. Բյուզանդիային հաջողվեց գրավել քաղաքը և ընդլայնել իր նվաճողական քաղաքականությունը դեպի արևելք և հարավ-արևելք: Հերթը հասավ Տարոնին:

Տարոնի հայկական իշխանությունը¹⁵ հիմնադրվել էր IX դարի առաջին կեսին: Հնում Տարոնը պատկանում էր Մամիկոնյանների նախարարական տանը. բայց VIII դարի ընթացքում աստիճանաբար անցավ Բագրատունիների ձեռքը: Տարոնի իշխանության հիմնադիրն էր իշխան Բագարատը:

Տարոնի իշխանության դրությունը հենց սկզբից շատ բարդ էր և դժվարին: Գտնվելով Բյուզանդական կայսրության և արաբական խալիֆայության միջև, նա հսկայական ճիգեր էր գործադրում պաշտպանելու համար իր անկախությունն ու ամբողջականությունը: Այդ բանը որոշ հաջողությամբ էր պսակվում շնորհիվ Տարոնի իշխանների հեռատես քաղաքականության: Կոստանդին Միրանաթինը պարզ գրում է, որ Տարոնի իշխան Գրիգորը բյուզանդական կայսեր բարեկամն էր խոսքով միայն, բայց գործով խալիֆային էր աջակցում: Նա հաճախ ուղեցույցի դեր էր խաղում արաբական այն զորքերի համար, որոնք կայսրության վրա արշավանքներ էին գործում: Նա բյուզանդացիների գաղտնի ծրագրերը հայտնում էր սարակինոսներին¹⁶:

Տարոնի իշխանության մեջ պակաս դժվարություններ չէին ներկայացնում ներքին անհամերաշխությունն ու պայքարը, որ հրահրում և օգտագործում էր կայսրությունը: Բյուզանդիան նախ և առաջ ջանք էր թափում ստիպել Տարոնի իշխան Գրիգորին խզելու իր կապերը խալիֆայության հետ: Ի վերջո այդ բանը նրան հաջողվեց: Իշխան Գրիգորը Լևոն Զ կայսեր ժամանակ ստացավ մագիստրոսի բարձր տիտղոսը և Տարոնի զորավարի կոչումը: Դա պարզ ապացույցն էր այն բանի, որ Տարոնը ոչ միայն խզել է իր կապերը արաբական խալիֆայությունից, այլև որ նա Բյուզանդիայի կողմից վասալական կախման մեջ է ընկել:

Տարոնում իր ազդեցությունը տարածելու համար Բյուզանդական կայսրությունն օգտագործում էր Բյուզանդիայում ծառայող հայազգի գործիչներին, որոնցից հայտնի են դրոմոսի խարտուլար Սինուտը, թարգմաններ Թեոդորոսը և Կրինիտեսը, պրոտոսպաթար Կոստանդինը և ուրիշներ: Փոքր դեր չխաղացին նաև խնամիական կապերը: Լևոն Զ-ը իշխան Գրիգորի ավագ որդի Բագարատին կնության տվեց մագիստրոս Թեոփիլակտոսի քրոջը, Գրիգորի եղբայր

¹⁵ Տարոնի մասին տե՛ս M. Brosset, Collection d'historiens arméniens, t. I Appendice II, Sur le Taron et des Taronites, էջ 613 sqq., S. Pétersbourg, 1874; J. Markwart, Südarmenien und die Tigrisquellen, Wien, 1930; N. Adontz, Les Taronites en Arménie et à Byzance, Études Arméno-Byzantines, Lisbonne, 1965, էջ 197—263; Idem, Observations sur la généalogie des Taronites, Réponse au R. P. V. Laurent, Byzantion, t. XIV (1938), fasc. 2, էջ 407—413; V. Laurent, Alliances et filiations des premiers Taronites, princes arméniens médiatisés, Échos d'Orient, t. 37 (1938), էջ 127—135.

¹⁶ De Administrando Imperio, էջ 188.

Ապոգանեմին՝ սլրոտոսպաթար Կոստանդնի դստերը։ Սակայն Բյուզանդիայի համար քիչ էր Տարոնի վասալական կախումը միայն, նրան անհրաժեշտ էր Տարոնի կատարյալ նվաճումը, քանի որ իրեն հենակետ էր պետք նորանոր նվաճումների համար Հայաստանում։ Գրիգոր իշխանի մահից հետո Տարոնը բաժանվեց մի կողմից վերջինիս որդիներ Բադարատի և Աշոտի և մյուս կողմից՝ Ապոգանեմի որդի Թոռնիկի միջև։ Նրանց միջև սուր սլաքար առաջացավ, որն ավարտվեց նրանով, որ Թոռնիկն ստիպվեց իր բաժինը «կտակել» կայսրությանը։ Տարոնի նվաճումը արդեն մեծ դժվարությունների հետ կապված չէր։ Իշխան Աշոտը նույնպես իր բաժինը «կտակեց» Բյուզանդիային, և նրա մահից հետո, 966 թ. Տարոնի նվաճումն ավարտվեց։

Թե ինչքանով էին այս «կտակումները» «կամավոր», վկայում է այն փաստը, որ տասը տարի անց, երբ Վարդապ Սկլերոսը ասլստամբուլյուն բարձրացրեց կայսեր դեմ, առաջինը նրա կողմն անցան Տարոնի իշխան Աշոտի որդիներ Գրիգորն ու Բադարատը, ըստ երևույթին իրենց կորցրած տիրույթներին վերստին տիրանալու հույսով։

Ամրանալով Տարոնում, Բյուզանդիան սկսեց արաբ ամիրաների ձեռքում գտնվող Հայաստանի մի շարք շրջանների նվաճումը։ Արդեն 968 թ. կայսրությունը գրավեց Ապահոնիքի կենտրոն Մանազկերտ քաղաքը։

Երկրի գլխին կախված վտանգի առաջ հայ ժողովուրդը ոտքի կանգնեց։ Հովհաննես Չմշկիկ կայսրը (969—976 թթ.) ծրագրել էր Հայաստանի վրայով արաբների դեմ արշավանքի դուրս դալ։ Հայերը, գիտենալով, թե ինչով կարող է դա վերջանալ, Աշոտ Գ-ի գլխավորությամբ կայսրին կանգնեցրին Հարք գավառում¹⁷։ Աշոտ Դ-ին միացան Աղվանքի և Վասպուրականի թագավորները, ինչպես և Կարսի, Անձեացյաց, Սյունիքի և Սասունի իշխանները։ Թեև այստեղ որևէ ռազմական ընդհարում տեղի չունեցավ, բայց եթե նկատի ունենանք բյուզանդական կին պատմիչ Աննա Կոմնենայի տվյալները, ապա կասկած չի կարող լինել, որ հայերը Հովհաննես Չմշկիկին մի այլ տեղում զինված դիմադրություն ցույց տվին։ Աննա Կոմնենան գրում է, որ Հովհաննես Չմշկիկը «նախկիններից և Արմենիական վայրերից» Թրակիա գաղթեցրեց հայ-պավլիկյանների, որոնց նախապես պատերազմում հաղթել էր և ղենքով տիրացել նրանց բերդերին և ամրացված տեղերին¹⁸։ Հասկանալի է, որ պավլիկյան շարժման ջախջախումից հարյուր տարի անց պավլիկյանները հազիվ թե կարող էին գոյություն ունենալ և, առավել ևս, տիրելով բերդերի, զինված դիմադրություն ցուցաբերել կայսեր։ Աննա Կոմնենայի պավլիկյանները ամենայն հավանականությամբ թոնդրակեցիներն են, հենց նրանք էին զինված դիմադրում բյուզանդական կայսրին¹⁹։

Բյուզանդիայի առաջխաղացմանը դեպի Հայաստան դիմադրություն էր ցույց տալիս նաև Տայքի կյուրապաղատ Դավիթը։ Եթե նա Վասիլ Բ կայսեր թագավորության առաջին տարում ընդառաջեց նրան, խաբվելով նրա խոստումից, թե կստանա «զինադտոյառիճ Կղէսուրան, զԶորմայրի և զԿարին, զԲասեան և զՍևուկ բերդակ, որ է Մարդաղի, զՀարք և Ապահոնիս... որպէս զի զօր առա-

¹⁷ Տե՛ս «Մատթէոսի Ուսհայեցոյ ժամանակադրութիւն», Վաղարշապատ, 1898, էջ 17։

¹⁸ Anna Comnena, Alexias, Migne, Patrologia graeca, t. 131, col 1097.

¹⁹ Տե՛ս Հ. Բարթիկյան, Պավլիկյանների առասպելական ծագումը ըստ հին բուլղարերեն մի ձեռագրի, ՀՍՍՀ ԳԱ «Տեղեկագիր» (հաս. գիտ.), 1957, № 1, էջ 89։

քեսցէ յօգնականութիւն նմա»²⁰ և օգնեց նրան Վարդաս Սկլերոսի ապստամբութիւնը ճնշելու գործում, ապա տասը տարի անց, երբ կայսրութեան ծրագրերը նրան պարզ գարձան, ստիպւած եղաւ միանալ Վարդաս Փոկասի ապստամբութեանը՝ ընդդէմ նույն կայսեր: Բայց Փոկասի պարտութիւնից հետո, վախենալով Վասիլ Բ-ի հաշվեհարդարից, Դավիթ կյուրապաղատը նույնպէս ստիպւեց իր տիրույթները «կտակել» կայսեր: 1000 թ., նրա մահից հետո (ավելի ճիշտ՝ սպանութիւնից²¹, նրա մահն արագացրին, հաւանաբար, բյուզանդացիները: որոնք շտապում էին ստանալ «իրենց ժառանգութիւնը») Վասիլ Բ-ը տիրացաւ Տայքին:

Վասիլ Բ-ը Ստեփանոս Ասողիկի տվյալներով «զամենայն բերդս և զամրոցս Տայոց նուաճեաց ընդ ձեռամբ իւրով, զհաւատարիմս կարգեալ ի նոսա, և զմնացեալ ազատսն Տայոց առաւ տարաւ ընդ ինքեան՝ բնակեցուցանել յաշխարհն Յունաց»²²:

Նույնպիսի «ժառանգութիւն» թողեց Վասիլին 1021 թ. նաև Վասպուրականի թագավոր Սենեքերիմը: Ի վիճակի չլինելով ընդդիմակայել բյուզանդական ճնշմանը՝ արևմուտքից և սելջուկյան ասպատակութիւններին՝ արևելքից և հարավից, նա լքեց Վասպուրականը և, ստանալով մագիստրոսի տիտղոսը, հաստատւեց Սեբաստիայում: Բյուզանդիան Վասպուրականում ստացաւ 72 բերդ, 4.000 գյուղ և 8 քաղաք²³:

Նվաճւած հայկական շրջաններում Բյուզանդական կայսրութիւնը կազմակերպում էր կառնակաւորութիւններ, որոնցից ամենակարևորը Վասպուրականի կառնակաւորութիւնն էր Վան կենտրոնով: Բյուզանդիան Վասպուրականին շատ մեծ կարևորութիւն էր տալիս, այնտեղ էին կուտակւում ստվարաթիւ զորքեր և առաքւում նշանավոր զորավարներ, որոնց նպատակն էր ամրապնդել արդեն ձեռք բերւածը և նախապատրաստութիւն տեսնել դեռևս իր գոյութիւնը պահպանող Շիրակի Բագրատունիների թագավորութեան նվաճման համար: Վասպուրականը վերածւեց մի ապաստարանի բոլոր նրանց համար, որոնք Բագրատունյաց թագավորութեան մեջ հալածւում էին իրենց բյուզանդասիրութեան համար: Նման դեր էր խաղում նաև Իբերիայի կառնակաւորութիւնը:

Բյուզանդիայի ճնշման տակ 1022 թ. Տրապիզոնում հայոց և բյուզանդացիների միջև պայմանագիր էր կնքւել, համաձայն որի Բագրատունի թագավոր Հովհաննէս-Սմբատը իր թագավորութիւնը «կտակում էր» կայսրութեան: «Անդեղև Հայոց կորստեան գիր և նամակ,— գրում է Արիստակէս Լաստիվերտցին,— քանզի Յովհաննէս պատուէր տուեալ էր հայրապետին, եթէ՝ Գրէ գիր և տուր կտակ թագաւորին, զի յետ իմոյ վախճանին՝ զիմ քաղաք և զերկիրս նմա տաց ի ժառանգութիւն»²⁴: Այս դեպքերի մասին ավելի հանգամանալից շարադրանք է պահպանել բյուզանդական ժամանակագիր Սկիլիցան: «Երբ Աբխազիայի ա-

²⁰ «Ստեփանոսի Տարօնեցոյ Ասողկան Պատմութիւն Տիեզերական», Ս. Պետերբուրգ, 1885, էջ 192:

²¹ Տե՛ս Մատթեոս Ուոհայեցի, էջ 38:

²² Ստեփանոս Տարօնեցի, էջ 278:

²³ «Սամուէլի քահանայի Անեցոյ Հաւաքմունք ի դրոց պատմագրաց», Վաղարշապատ, 1893, էջ 104: Վասպուրականի մասին տե՛ս վերջերս լույս տեսած հետևյալ ուսումնասիրութիւնը. Վ. Վարդանյան, Վասպուրականի Արծրունյաց թագավորութիւնը, Երևան, 1969:

²⁴ «Պատմութիւն Արիստակիսի Լաստիվերտցոյ», աշխատասիրութեամբ Կ. Ն. Յուսեփյանի, Երևան, 1963, էջ 32:

ռաջնորդ Գեորգիոսը, — դրում է նա, — պատերազմ սկսեց հոռոմների դեմ, նրան միացավ Անիի տեր Հովհաննեսիկը: Սակայն երբ Վասիլ կայսրը ղենքով գալով Իբերիա, պատերազմ սկսեց Գեորգիոսի դեմ, հաղթեց և ոչնչացրեց նրան, Հովհաննեսիկը վախենալով կայսեր հաշվեհարդարից այն բանի համար, որ ինքը՝ Հովհաննեսիկը միացավ Գեորգիոսին, և կայսրը կարող է իրեն վնաս հասցնել, վերցնելով Անիի բանալիները, անձնապես դիմեց կայսեր, կամավոր կերպով նրան հանձնեց քաղաքի բանալիները և իրեն: Կայսրը դրվատեց Հովհաննեսիկի ողջամտությունը, նրան շնորհեց մադիստրոսի տիտղոս և նշանակեց Անիի և Մեծ Հայքի ցմահ իշխան, նրանից գրություն ստանալով, թե նրա՝ Հովհաննեսիկի, մահից հետո նրա բոլոր տիրույթները անցնելու են Վասիլի ձեռքը և դառնալու են հոռոմների կայսրության բաղկացուցիչ մասը»²⁵:

1042 թ. անժառանգ վախճանվեց Հովհաննես-Սմբատ թագավորը: Նրա եղբայր Աշոտը, որ մի տարի առաջ էր մեռել, ուներ Գագիկ անունով տասնութամյա մի որդի, որը և ստացավ Շիրակի թագավորության դահլ: Սակայն Բյուզանդիան չմոռացավ Տրապիզոնում կնքված համաձայնությունը: Կոստանդին Մոնոմախ կայսրը պահանջեց «իր ժառանգությունը»: Մերժում ստանալով, հայերի դեմ նա ձեռնարկեց երկարատև և անհաջող մի պատերազմ: Ի վերջո նենգությամբ միայն Բյուզանդիային հաջողվեց վերացնել Շիրակի թագավորությունը:

Շիրակը մինչ այդ գոյություն ունեցող Իբերիայի կատեպանության հետ կապվեց մի վարչական միավոր, որի Անիում նստող կառավարիչն սկսեց կոչվել «Անիի և Իբերիայի կառավարիչ» (τοῦ Ἀνίου καὶ τῆς Ἰβηρίας κατάρχων) կամ «Հայաստանի և Իբերիայի կատեպան» (κατεπανὼ Ἀρμενίας καὶ Ἰβηρίας): Անին մի հենակետ դարձավ Բյուզանդիայի նորանոր նվաճումների համար, քանի որ նրա ախորժակները դեռ չէին հագեցել: Անիի գրավման հաջորդ տարին՝ 1046 թ. Բյուզանդիան պատերազմ սկսեց Շիրակի Բագրատունիների դեմ մղած պայքարում իր նախկին դաշնակից Դվինի ամիրա Աբու-լ-Ասվարի դեմ, բայց չարաչար պարտություն կրեց: Թեև 1047 թ. կայսրությունը հաղթականորեն առաջ էր շարժվում, Դվինի ամիրայից խլելով մի շարք ամրոցներ, սակայն Բյուզանդիայում ծագած լեռն թոռնիկի ապստամբությունը ճնշելու համար ստիպված եղավ իր զորքերն այստեղից ետ կանչել և բավարարվել ձեռք բերածով:

* * *

Բյուզանդիան նվաճված շրջաններում սկսեց գործադրել հայ տոհմիկ ազնվականությանը բուն երկրից հեռացնելու քաղաքականությունը: Շնորհիվ բարձր պատվաստիճաններ և տիտղոսներ, ինչպես և լայնատարած կալվածներ բուն կայսրության տերիտորիայում, նրան հաջողվեց աստիճանաբար փոքր Ասիա և Բալկաններ տեղափոխել հայ ազնվականության մի ստվար բազմություն: Վերևում առիթ ունեցանք մատնանշել կայսրության նման քայլը Տայքի ազնվականության նկատմամբ: Բայց դեռ դրանից առաջ, իր թագավորության հենց սկզբում Վասիլ Բ-ը, Ստեփանոս Տարոնեցու ասելով, «կամեցալ յազգէն Հայոց, որ ընդ իւրով թագաւորութեամբն՝ անցուցանել ի Մակեդոնիա ընդդէմ Բուլղարացն, զի շինեսցեն զերկիրն: Որ և տարեալ բնակեցոյց զյուլվս յաշխարհն յայն»²⁶: Ավելի պատկերավոր կերպով է նկարագրում այդ

²⁵ Georgii Cedreni Historiarum Compendium, t. II, Bonnae, 1839, էջ 556—557:

²⁶ Ստեփանոս Տարոնեցի, էջ 201:

քաղաքականությունը և դրա ավերիչ հետևանքները հայերի համար Արիստակես Լաստիվերտցին. «Ելին իշխանքն ի հայրենի ժառանգութենէ իւրեանց, և եղեն պանդուխտ յօտար երկիր՝ յորում աւերեցան գաւառք և գնացին յաւարտանն Յունաց: Եղեն շինանիստ աւանք՝ բնակութիւն գաղանաց, և անդաստանք նոցա՝ յարօտ երէոց: Տունք ցանկալիք, բարձրացելունք և մեծամեծք՝ եղեն բնակութիւնք համբարեաց և յուշկապարկաց»²⁷:

Որպես կանոն բյուզանդիան տեղում թողնում էր իրեն հավատարիմ ազնււականներին, միաժամանակ աշխատում էր նվաճված տերիտորիաներում բնակեցնել բյուզանդական ֆեոդալներին, որոնց ամենաաչքի ընկնող ներկայացուցիչներից մեկը Եվստաթիոս Բոյիլասն էր²⁸:

Նվաճողների հետ միասին Հայաստան մուտք գործեցին բյուզանդական կարգն ու կանոնը, բյուզանդական վարչաձևն ու ծանր հարկապահանջությունը: Հիշելով Վասիլ Բ-ի վարչական քաղաքականության մասին Հայաստանում, Արիստակես Լաստիվերտցին գրում է, որ նա «տիրէ բազում գաւառաց և բերդից և քաղաքաց: Եւ կացուցանէ ի վերայ նոցա գործակալս և դատաւորս և վերակացուս»²⁹: Դեռևս 1018 թ. նույն Լաստիվերտցու տվյալներով՝ «առաքէ ինքնակալ թագաւորն գնիկոմիդացի իշխան ոմն, որ եկեալ մարդահարկ արկանէ երկրիս»³⁰: Հարկահավաքների շարաշահումները, որոնք զխավորապես կապված էին հարկերի հավաքումը կապալով տալու պրակտիկայի հետ, բնակչության արդարացի դայրույթն էին առաջացնում: Դեպքերին ժամանակակից «Ստրատեգիկոնի» հեղինակ Կեկավմենոսը խորհուրդ է տալիս կայսեր վերջ դնել բյուզանդական պաշտոնյաների այդ շարաշահումներին, հատկապես «սահմանամերձ շրջաններում», քանի որ այդ բանը, նրա ասելով, պատճառ դարձավ բազում գավառների կորստյան և շատերի՝ թշնամու կողմըն անցնելուն³¹: Նման քաղաքականության մասին է վկայում և մագիստրոս Բագարատ Վիկացու, Արևելից կատապանի արձանագրությունը, որ փորագրված է Անիի մայր տաճարի պատի վրա³²:

Բյուզանդական կառավարիչները և՛ Վասպուրականում, և մնացած Հայաստանում, որպես կանոն, ծագումով հույներ էին, հազվադեպ՝ բուլղարներ: Միայն բյուզանդական տիրապետության վերջին շրջանում, երբ արտաքին վտանգը գնալով սաստկացավ, կայսրությունը կառավարիչ նշանակեց հայերից, որոնցից ամենից աչքի ընկնողը Գրիգոր Մագիստրոսն էր, որ մի թղթում իրեն անվանում է «Վասպուրականի և Տարօնոյ և Մանազկերտի, Արճիշոյ, Բերկրոյ, Միջագետաց տէր և Սօնումախին մագիստրոս, վէստ և տուկ»³³, իսկ Կելառիսի 1051 թ. փորագրված արձանագրության մեջ նույն «կի-

²⁷ Արիստակես Լաստիվերտցի, էջ 55:

²⁸ Տե՛ս 2. Բարթիկյան, Եվստաթիոս Բոյիլասի կտակը (1059 թ.) որպես Հայաստանի և Վրաստանի պատմության կարևոր սկզբնաղբյուր, «Բանբեր Մատենադարանի», № 5, 1960:

²⁹ Արիստակես Լաստիվերտցի, էջ 24:

³⁰ Նույն տեղում, էջ 28:

³¹ Cecaumeni Strategicon, ed. wassiliewsky et Jernstedt, Petropoli, 1896, էջ 28:

³² Մանրամասն տե՛ս Բ. Бартикян, Эникион в Византии и столице армянских Багратидов Ани в эпоху византийского владычества, «Պատմա-քաղաքական հանդես», 1968, № 2, էջ 127—128:

³³ «Գրիգոր Մագիստրոսի Թղթերը», Ալեքսանդրապոլ, 1910, էջ 213:

տոնիտ»³⁴, այսինքն սկսեցին պահանջներ արդեն ծագել, որ Գրիգոր Մազիստրոսը մինչ այդ Կոստանդնուպոլսում բյուզանդական կայսրերի պալատում էր ծառայել: Բյուզանդիան օգտագործում էր նաև ծաղումով հայ, բայց դավանանքով քաղկեդոնիկ հայերի, որոնցից կարելի է նշել Բադարատ Վիսկացու և Գրիգոր Բակուրյանի անունները:

Սկզբնական շրջանում Բյուզանդիան պահպանեց հայկական, ինչպես և իրերական զորքերը, և դա հասկանալի է: Այդ զորքերը կայսրությանը պետք էին նորանոր նվաճումների համար և արևմուտքում, և արևելքում: Այդ զորքերը օգտագործում էր դեռևս Հովհաննես Չմշկիկը 969 թ. բուլղարների դեմ մղված պատերազմում³⁵: Բուլղարների դեմ նրանց օգտագործեց նաև Վասիլ Բ-ը³⁶, թեև միշտ չէ, որ նրանք հավատարիմ ծառայում էին կայսեր և ոչ հաղվադակ լքելով նրան, անցնում էին հակառակորդի կողմը: Տայքի Դավիթ կյուրապաղատի մահից անմիջապես հետո Վասիլ Բ-ը «հրամայեց ղորացն Չորրորդ Հայոց և Տարօնոյ՝ օղնական լինել նմա յոր պէտս և կոչեսցէ»³⁷: Վասիլի հաջորդների օրոք էլ Բյուզանդական կայսրությունը չէր հրաժարվում հայկական զինված ուժերի ընձեռած հնարավորություններից: «Յայսմ ամի,— գրում է Մատթեոս Ուռհայեցին,— ղորաժողով արար թագաւորն Հոռոմոց Միխայիլն զամենայն աշխարհն Յունաց և այլ ի Հայոց ղորացն, որք ընդ Հոռոմոց իշխանութեամբն էին՝ Սեբաստիա և Տարօն և ամենայն Վասպուրական. և անթիւ բաղմութեամբ հասանէր թագաւորն Միխայիլ յարևմուտք և գերի առեալ զամենայն աշխարհն Գթաց»³⁸:

Հայոց զինված ուժերը կայսրությունը պահպանեց նաև Անիի գրավումից հետո էլ: Սպարապետ Վահրամ Պահլավունին իր որդու՝ Գրիգորի հետ հայոց զորքերով մասնակցեց 1046 թ. դվինյան արշավանքին ընդդեմ ամիրա Աբու-լ-Ասվարի: Հենց այդ արշավանքի ժամանակ էլ իր որդու հետ նա սպանվեց³⁹: Սկիւիցայի տվյալներով նույն արշավանքին մասնակցում էր նաև իբերական զորքը⁴⁰: Սակայն իր զորքերն ամրապնդելուց հետո կայսրությանն այլևս այդ զորքերը պետք չէին, դեռ ավելին, նրանք իր համար վտանգավոր էին: Եվ Բյուզանդիան շահապաղեց այդ զորքերը լուծարքի ենթարկել, դրա դիմաց ստիպելով հայերին և վրացիներին նաև զինվորական հարկ վճարել⁴¹:

Նվաճված շրջանները, հատկապես Միջագետքն ու Հայաստանը, դավաճաբանական տեսակետից միաբնակ էին: Բյուզանդական կայսրությունը շատ հաճախ միջամտում էր հայերի և ասորիների եկեղեցական գործերին, նույնիսկ հալածանքներ էր ձեռնարկում ու ստիպում, որ նրանք ընդունեն Քաղկեդոնի դավանանքը: Դեռ Հայաստանի լիակատար նվաճումից առաջ, 986 թ. Սեբաստիայի մետրոպոլիտը սկսել էր հայադավանների հալածանքները: «Եւ կանացի հովիւքն և մետրապօլիտն Սեբաստիոյ,— գրում է Ստեփանոս Տարոնեցին,— սկսան նեղել զազն Հայոց վասն հաւատոյ. և զբռնու-

34 Կ. Կոստանյանց, Վիմական Տարեգիր, Ս. Պետերբուրգ, 1913, էջ 23:

35 Ստեփանոս Տարոնեցի, էջ 245: Հմմտ. էջ 201:

36 Նույն տեղում, էջ 244:

37 Նույն տեղում, էջ 276:

38 Մատթեոս Ուռհայեցի, էջ 88:

39 Նույն տեղում, էջ 98:

40 Georgii Cedreni, t. II, էջ 559:

41 Michaelis Altailotae, Historia, էջ 81:

թիւն ի ձեռն առեալ՝ սկսաւ տանջել զքահանայս վասն հաւատոյ, և զզլխաւոր քահանայս Սեբաստիոյ քաղաքին երկաթեղէն կապանօք հասուցանէր ի դռնն թագաւորին: Եւ ի բանտի չարչարեալ զաւայն երիցանցն զԳարրիէլ սպանին... Իսկ այլք յաննշան քահանայիցն և երկու ևս իսկուպոսունք Սեբաստիոյ և Հառիսոյ, Սիօն և Յովհաննէս, ի ձեռն նոյն մետրապօլտին ընկալան զժողովն Քաղկեդոնի, ի բաց կալով ի միաւորութենէն Հայոց»⁴²:

Սակայն պետք է ընդգծել, որ կայսրութեան դավանաբանական քաղաքականութիւնը որոշ չափով ձկուն էր և հաճախ փոխվում էր, նայած ժամանակին ու պարագաներին: Եթե, օրինակ, նախապատրաստվում էր որևէ նոր հարձակում հայկական հողերի վրա, միաբնակների հալածանքները, որպես կանոն, դադարեցվում էին, որպեսզի այնուհետև ծավալվեն նորանոր խստութեամբ: Եթե Անիում բյուզանդական տիրապետության սկզբնական շրջանում, կատեպան Ասիտի իշխանության ժամանակ, Պետրոս կաթողիկոսը դեռևս փառք ու պատվի մեջ էր՝ հայոց պետականության անկման նախօրյակին իր ցուցաբերած բյուզանդասիրության պատճառով, ապա շատ չանցած, Կատակալոն Կեկավմենոսի կատեպանության ժամանակ դրութիւնը փոխվեց: Հարցն այն է, որ հայոց պետականության անկումից հետո հայերին կենտրոնացնող և կաղմակերպող զլխավոր ուժը հայոց կաթողիկոսութիւնն էր մնացել: Դա ձեռնտու չէր Բյուզանդիայի համար և Կատակալոն Կեկավմենոսը շուտով վերացրեց հայոց կաթողիկոսութիւնը Անիում, այն տեղափոխելով Բյուզանդիային ավելի մոտ շրջան: Հենց Կեկավմենոսն էր, որ «խաբանօք հանէ զնա (Պետրոս կաթողիկոսին—Հ. Բ.) ի քաղաքէն ասելով, եթէ հրամայեալ է քեզ թագաւորն տեղի բնակութեան ի Կարին գաւառի յԱրծին աւանի»⁴³: Բյուզանդիան այնտեղ էլ չէր ուզում թողած լինել Պետրոսին: Նրան նա բերում է ավելի ասպհոլ տեղ՝ Կոստանդնուպոլիս, որտեղ «պահաց զնա ամս երիս, քանզի կասկածէր թողուլ ի Հայս՝ թէ երթեալ ասպտամբեցուցանէ զԱնի»⁴⁴: Դեռ ավելին, Պետրոսի հաջորդ խաչիկ կաթողիկոսի Կոստանդնուպոլսում եղած ժամանակ բյուզանդացիները փորձեցին հարկատու դարձնել նաև հայոց եկեղեցին անգամ: «Ընդ հարկիւ կամէին արկանել զնա (խաչիկ կաթողիկոսին—Հ. Բ.). իսկ նա ոչ առնու յանձն, թէ զոր մինչև յիմ ժամանակն չէ լեալ՝ և ոչ ես հաւանիմ»⁴⁵:

Բյուզանդական տիրապետութիւնը Հայաստանում հանդիպում էր հայ ժողովրդի ուժեղ դիմադրութեան, ժողովուրդը աշխատում էր ամեն կերպ թոթափել կայսրության լուծը և վերականգնել իր անկախութիւնը: Հետաքրքրական է նշել, որ երբ Բյուզանդիայում կենտրոնական կառավարության դեմ որևէ ասպտամբութիւն էր բռնկվում, հայերն աշխատում էին մասնակցել նրան: Վարդաս Սկլերոսը ազգութեամբ հայ էր: Նա 976 թ. ասպտամբելով Վասիլ Բ-ի դեմ, հնարավոր է, նպատակ չունէր հայկական հողերն ազատագրել բյուզանդական լծից: Նրա նպատակները, հաւանաբար, այլ էին: Բայց մենք իրավունք չունենք նրա կողմն անցած բոլոր հայերին համարել ասպտամբներ, որոնց միտքն ու նպատակը Սկլերոսին բյուզանդական զահ բարձ-

⁴² Ս տ և փ ա ն ո ս Տ ա ր ո ն ե ց ի, էջ 201—202:

⁴³ Ա ր ի ս տ ա Կ և ս Լ ա ս տ ի վ և ր տ ք ի, էջ 63:

⁴⁴ Նույն տեղում, էջ 82:

⁴⁵ Նույն տեղում, էջ 83:

րացնելն էր: Վերջինիս ապստամբությունը բռնկվեց կայսրության կողմից Կարինի, Տարոնի, Ասպահունիքի և Հարբի նվաճումից շատ շանցած: Ապստամբ Սկլերոսին կայսր հռչակեցին նախ և առաջ հայերը⁴⁶ (τῶν Ἀρμενίων κατὰ τὸ ξένων τῆς ἐνδοκλείας): Առաջին վայրը, որտեղ Սկլերոսը հաստատվեց, հայկական հարբերդ ամրոցն էր⁴⁷ (Χαρπιδε): Ապստամբի ձեռքում էր գտնվում հայկական Միջագետքի և Չորրորդ Հայքի զգալի մասը՝ Հիսն ալ-Ի. ռ. ժ. ր. Տ.-ը, Հովիտը՝ Տարոնից հարավ, Սասնա բերդը, Անգեղտունը, Անձիտը, Թիլ հումը՝ Արվանայից հարավ-արևելք և Հանին⁴⁸: Սկլերոսը իրեն կայսր հռչակեց նախկին Երրորդ Հայքի մայրաքաղաք Մելիտենեում⁴⁹: Ապստամբի կողմն է անցնում Բյուզանդիայում ծառայող հայկական հեծելազորը⁵⁰: Սկլերոսին են միանում Մոկքի իշխան Զափրանիկը, ինչպես և Տարոնի իշխանի որդիներ Գրիգորն ու Բազարատը⁵¹, որոնք դրանից տասը տարի առաջ զրկվել էին իրենց տիրույթներից: Սկլերոսի կողմն է անցնում բյուզանդական հայազգի զորավար Սահակ-Վահրամը⁵²: Ապստամբները գալիս են Լիկանոս բանակաթեմը⁵³, բանակաթեմ, որ Կոստանդին Միրանածինի տվյալներով հիմնադրվել էր հայերի կողմից և որի բնակչությունը բացարձակապես հայերից էր բաղկացած⁵⁴: Սկլերոսի կողմն է անցնում Անտիոքի դուքս Վուրցիսը հայկական զորքերով⁵⁵: Նա գալիս է հայկական Մամեդավ (ՄՇաբանոս) քաղաքը⁵⁶: Սկլերոսին է միանում նաև բյուզանդական հայազգի ծովակալ Միքայել Քուրդիկը⁵⁷: Մի՞թե բոլոր այս հայերի միտքն ու ձգտումը Սկլերոսին բյուզանդական զահին տիրանալուն օժանդակելն էր միայն: Թվում է ոչ: Նրանց նպատակն էր նախ և առաջ Բյուզանդիայի ձեռքն անցած հայկական շրջանների ազատագրումը, մնացած անկախ հայկական հողերի նվաճման կանխումը: Եվ եթե ի վերա մամենայնի նկատի առնենք այն խոստուն փաստը, որ Վասիլ Բ-ը Վարդաս Սկլերոսի դեմ հավաքագրեց բացարձակապես «զղորսն Բիւզանդիոնի և զԹրակացին և զՄակեդոնացին հանդերձ մամենայն առևմտեայ ազգօքն»⁵⁸, որոնք Սկլերոսի առաջին պարտության ժամանակ սկսեցին կոտորել գերի ընկած հայերին միայն⁵⁹, ապա մեր ենթադրությունը Սկլերոսի ապստամբության բնույթի մասին կհաստատվի:

⁴⁶ Georgii Cedreni, t. II, էջ 419.

⁴⁷ Նույն տեղում, էջ 419:

⁴⁸ Մանրամասն տե՛ս M. Canard, Deux documents arabes sur Bardas Sklèros, Atti del V Congresso Internazionale degli Studi Bizantini (Studi Bizantini e Neoellenici), vol. V, Roma, 1936, էջ 60—61:

⁴⁹ Ստեփանոս Տարոնեցի, էջ 191:

⁵⁰ Նույն տեղում:

⁵¹ Նույն տեղում:

⁵² Georgii Cedreni, t. II, էջ 422:

⁵³ Նույն տեղում:

⁵⁴ Constantini Porphyrogeniti De Thematibus, Bonnae, 1828, էջ 32—33:

⁵⁵ Georgii Cedreni, t. II, էջ 423—424:

⁵⁶ Նույն տեղում, էջ 423:

⁵⁷ Նույն տեղում, էջ 424:

⁵⁸ Ստեփանոս Տարոնեցի, էջ 191:

⁵⁹ Georgii Cedreni, t. II, էջ 425—426: (πολλοὶ τῶν σὺν αὐτῷ (τῷ Βούρτζη) ἀπώλοντο, καὶ πολλοὶ τῶν Ἀρμενίων παντας γὰρ τοὺς ἀλόνοντας τῶν Ἀρμενίων ἀπεσφίττον οἱ Ῥωμαῖοι, μὴ λαμβάνοντες οἶκτον οἷα το πρῶτους προσχωρησαι τῷ ἀποστάτῃ).

Հայերը փորձեցին ապստամբել կայսրության դեմ նաև 1051 թ.: Չորրորդ Հայքի Պաղին զավառում նախապատրաստված ապստամբությունը դավաճանության պատճառով շրոնկվեց⁶⁰: Բայց Բյուզանդիայի տիրապետության դեմ մղված պայքարում մեծ դեր էին խաղում թոնդրակեցիները և հասկանալի է թե ինչու Բյուզանդիան դեռ X դարի երկրորդ կեսից սկսած կատաղի պայքար էր մղում նրանց դեմ: Ի վերջո կայսրությանը հաջողվեց XI դարի կեսերին ձնշել նրանց շարժումը:

Կայսրության քաղաքականությունը Հայաստանում շատ կարճատև էր: Նա սեփական ձեռքերով քանդեց այն պարիսպը, որ դարեր շարունակ կանգնած էր այլազգի հորդանների ներխուժումների դեմ:

ЗАВОЕВАНИЕ АРМЕНИИ ВИЗАНТИЙСКОЙ ИМПЕРИЕЙ

Р. М. БАРТИКЯН

(Р е з ю м е)

Со второй половины IX в., в связи с постепенным ослаблением халифата и продвижением Византии на восток и юго-восток, «армянский вопрос» вновь стал на повестку дня внешней политики империи.

Благодаря своей военной мощи и тонкой дипломатии, Византия до середины XI в. завоевала почти всю Армению, приобретшую независимость от халифата, в том числе Таронское (966) и Тайкское (1000) княжества, Васпураканское царство Арцрунидов (1021) и Ширакское царство Багратидов (1045). На завоеванных территориях Армении Византия стала проводить политику удаления из страны армянской родовой аристократии. Вместе с тем империя установила в Армении тяжелый налоговый гнет, стала вмешиваться в церковные и конфессиональные дела армян, преследовать монофизитов.

Владычество Византии в Армении встречало сильное сопротивление армянского народа, выражавшееся в открытых выступлениях против завоевателей, в борьбе против дальнейшего продвижения империи в Армению, в участии в разных восстаниях византийской военной аристократии, направленных против центральной власти, в том числе в восстании Варды Склира.

В результате такой политики империи в Армении была уничтожена организованная сила, способная противостоять нашествиям сельджуков. В 1071 г. произошло известное сражение при Маназкерт (Манцикерт), ставшее началом конца Византийской империи.

⁶⁰ Մ տ թ ե ո ս Ու ռ հ ա յ ե ց ի, էջ 109: